



KOMUNIKADO PA PRENSA

Fecha
14 yüli 2017

Kolaboradó di Maneho
Corinne Leysner

Email
corinne.leysner@gobiernu.cw

Trabounan di infrastruktura na parti Wèst di Kòrsou por kousa molèster

Willemstad- Hendenan ku ta bai direkshon di Westpunt tin ku tene kuenta ku diferente trabounan di kaya, ku por okashoná molèster pa outomobilistanan den e siman ku ta sigui. Obra Públiko ta traha riba proyektonan largu na dos kaminda di e parti Wèst di nos isla, pa mehora e infrastruktura i na mes un momentu sòru pa e kamindanan ta mas sigur pa e hende ku ta trafiká riba dje. Ta trata di trabounan na Kaminda Popo Rojer na altura di Barber i di Kaminda di Westpunt, entre Wakawa i Savonet.

E trabounan na Barber, dilanti di e banko i di e konosido marshe, ta kuminsá riba djaluna dia 17 di yüli próksimo. Ta kita e kapa di asfalt i fundeshi, sak e kaya 12cm pa por mantené e altura di alsera intakto. Despues ta pone un fundeshi nobo di "kalksteen" i un kapa nobo di asfalt di 7cm. Ta krea posibilidat pa parker na banda di kaya. E asera ta haña un fundeshi nobo di diabaas ku un kapa di aros di 5cm , ku klenku i bant haltu di betòn.

Ta traha tambe kuater parada di bus, di kual unu riba asera, kaminda ta posibel pa pone un abri (kasita pa skonde pa solo i áwaseru). Pa evitá ku tráfiko ta pasa muchu duru den e besindario kaminda tin bastante hende na pia, ta pone kuater kusinchi pa baha velocidat i zebrapad pa krusa kaya. Ehekushon di e trabounan tin un durashon di 12 siman, partí den dos fase pa minimalisá mas tantu posibel e molèster pa tur usuario.

Durante di e trabounan ta tene e kaya parsialmente será pa tráfiko. Pa subi Kaminda Popo Rojer ta desviá tráfiko riba Weg naar Westpunt via Kaya Emiterio Doran (Parke Himno i bandera) i Kaya Johannes Fransisco i sigui pa direkshon di e rotònde i vise vèrsa. Kaminda Popo Rojer ta keda aksesibel pa habitantenan i komersiantenan, ounke ta pidi si pa hende tene kuenta ku e trabounan na e pida kaminda.

E otro proyekto ku tráfiko tin ku tene kuenta kuné ta esun riba Kaminda pa Wèspen. Akinan e kontratista Aliansa BV ta sigui ku e trabounan di asfaltá e kaminda for di Wakawa bai Savonet. E trabounan aki ta sufri di un tiki tardansa pa motibu ku algun biaha kaba , dor di falta di bitumen, ku ta mara e asfalt na otro. Dor ku sentral di B00 no ta traha na su kapasidat mas haltu, tin falta di e produkto akí.

Hende ku ta bai òf bin for di Wespen, mester tene kuenta ku e pida kaminda ei ta será durante di e trabounan, pa motibu ku asfalt kayente por hasi daño na tayer di outo. Obra Públiko i Aliansa ta pidi pa tuma e ruta alternativa via di Lagun-Sta.Cruz-Soto i direkshon kontrali. Ta pidi kompreshon pa e molèster kousá, ku, na final di e proyekto, ta terminá den un kaminda mas mihó, duradero i sigur.